



# *Kattusseqatigiit Partiiat*

29 november 2010

Inatsisartut suleriaasianni § 36 imm. 1 naapertorlugu apeqquteqaat imaattoq Naalakkersuisunut ingerlateqqippara:

## **Naalakkersuisunut apeqqutit:**

- 1. Nunatsinni imaatigut silaannakkullu angallannermi annertuumik ajunaarnersuarmik pisoqassangaluarpat, sillimaniarnikkut qanoq pisortatigoortumik piareersimasoqarpa?**
- 2. Nunarput ataatsimut tamaat isigalugu illoqarfiit nunaqarfiilluunniit ilaanni ajunaarnersuarmik pisoqassangaluarpat qatserisartut atortutigut pisariaqartitaat ullutsinnut naleqquppat ?**
- 3. Imaatigut silaannakkullu sillimaniarnerup nutarteriffigineqarsinnaanera pillugu qallunaat naalakkersuisui oqaloqatigineqarnissaat pilersaarutigineqarpaa ?**

(Inatsisartunut ilaasortaqa Knud Fleischer, Kattusseqatigiit Partiiat)

## **Tunngavilersuut:**

Ulluni makkunani ilaatigut tusarparput nunatsinni imaatigut ilaasunik ingerlassisartooq ikkarlittoq ilaasullu assut tupatsinneqarsimasut, qujanartumilli angallassuaq ulimmat nammineq kaanngarpoq.

Kisianni nunatsinni imaatigut angallassuaq ingerlaartilluni ikuallaleraluarpat sutigut sillimavugut, qanorlu sulisutigut aammalu atortutigut piareersimatigaagut?

Nuna tamaat eqqarsaatigalugu, tassami nunap immikkoortoqarfiini qatserisartut qanoq atortutigut sillimatigaat aammalu ikiuiartornissaq pillugu qanoq piareersimatigaagut, kiisalu qatserisartut qanoq angallammi ikuallattumi qanoq qamiterinissaminut ilisimasaqatsigaat.

Kattusseqatigiit Partiiianiillu isumaqarpungut sillimaniarnermut tunngatillugu nunarput annertuumik suliaasaqartoq, tassami umiarsuaq imaluunniit imartatsinni ingerlanermi aammalu nunakkut ingerlanermi annertuumik ajunaarnersuarmik pisoqaraluarpat piareersimanerput tamatta ilisimasaqarfiginerusariaqarparput, taamaattumik suliaq sillimaniarnermut tunngasoq pimoorullugu suliarineqareersimasariaqartoq soorunami naatsorsuutigaaarput.

Umiarsuaq ikkarlittoq annertunerusumik ajoquserfiunngimmat qujanaqaaq, kisianni umiarsuaq ikuallattoq illoqarfiilluunniit ungasinngittuaniittoq inunnik amerlasuunik ilaasulik qanoq

iliorfigissallugu sillimalluarfigisariaqarpoq, taamaattumik nunatsinni Politikkerit annertuumik qallunaat nunaanni oqartussat suleqatigalugit nunatsinni sillimaniarneq pillugu annerusumik piareersaasiortariaqartut isumaqarpugut.

Assersuutigalugu qallunaat nunaat timmisartumik nunatsinnut inissiisariaqarpoq pisoqarnerani sillimajuartussamik, maannakkumut isumaqatigiissutigineqarsimasumiit pitsaannerusumik, imaluunniit qallunaat nunaat Air Grenlandimut isumaqatigiissusiortariaqarpoq ajortoornersuarmut sillimajuaannartussamik inissiinissamut, massakkut inuit inuunerinik naleqarsinnaasumik annertuumik pisoqassagaluarpat nunatsinni sillimaniarnikkut piareersimaneq annikippallaarsorinarpoq.

Taamaattumik siusinnerusukku isumaqatigiissutaasimasup nutateneqarnissaat matumuuna ujjartorpara, nunakkut silaannakkut imaatigullu sillimaniarneq pillugu ajutoornissaq utaqqinagu qanoq iliuuseqartoqartariaqartoq Kattusseqatigiit Partiaaniit kaammattuutingerusupparput.